

**Umiarsualivimmiinnermut aamma umiarsuarni takornarianik angallassisuni ilaasut
akileraarutaat pillugit Inatsisartut inatsisaata allanngortinneqarnissaa pillugu
Inatsisartut inatsisissaattut siunnersuummut saqqummiussissut**
(Aningaasaqarnermut Akileraartarnermullu Naalakkersuisoq)

Akissuteqaat

Aappassaaneerinninneq

Naalakkersuisut sinnerlugit ataatsimiititaliap inatsisissatut siunnersuummik sukumiisumik suliaqarnera qujassutigaa.

Ataatsimiititaliap isumaliutissiisummini inatsisissatut siunnersuummut atatillugu sinerissami pissutsit pillugit apeqqutinik arlalinnik saqqummiussivoq. Naalakkersuisut sukumiisumik akissuteqartarneq pingaartippaat, taamaammallu piaartumik apeqqutinut taakkununga akissutinik ataatsimiititaliamut nassitsissaaq.

Annertussutsinit siunnersuummi taaneqartunit qaffasinnerusunik akileraaruteqartitsinissaq partiinit amerlanerussuteqartunit aamma kissaatigineqartoq ataatsimiititaliap paasivaa.

Tamatuma aningaasanut inatsimmik isumaqatiginninniarni annertuumik oqaluuserineqarnera, Naalakkersuisut tassunga atatillugu ilisimatitsissutigissavaat. Taamaammat apeqqut tamanna aningaasanut inatsimmik isumaqatigiisummi isummerfigineqassasoq Naalakkersuisut ilimagaat. Tamannalu tunngavigalugu maannakkuugallartoq akitsuutit qaffanneqarnissaannut aassigisaanullu apeqqutit Naalakkersuisut iserfigissanngilaat.

Inatsisissatut siunnersuummi oqaasertatigut amigaatit ataasiakkaat aaqqinneqarnissaat siunertaralugu pingajussaaneerinninnissamut allannguutissatut siunnersuummik saqqummiussinissamik ataatsimiititaliap isumaqatigiittup kaammattuutaa Naalakkersuisut tusaatissatut tiguaat. Ataatsimiititaliap kaammattuutaa tunuliaqutaralugu Naalakkersuisut suliaq misissussavaat, pisariaqarpallu allannguutissatut siunnersuummik naapertuuttumik saqqummiussillutik.

Tamanna tunuliaqutaralugu siunnersuutip ataatsimiititaliamut suliareqqinneqartussanngortinnissaanut innersuussinissaq Inatsisartut isumaliutigissagaat Naalakkersuisut siunnersuutigaat. Ataatsimiititaliaq taamaalilluni ataatsimiititaliap apeqqutaanut akissutinik allannguutissatullu siunnersuutaasinnaasumik ilassutitut isumaliutissiisummi isummersinnaassaaq.

Taama oqaaseqarlunga siunnersuut Inatsisartunut kajumittumik oqallisigisassanngortippara.